

Акафист святому равноапостольному великому князю Владимиру, во св. Крещении  
Василию

---

*Автор: свящ. Симеон Соловьев*

*Утвержден: решение Св. Синода 15/27 февраля 1878 года №256*

**Память:** 28 июля (15 июля ст. ст.)

### Кондак 1

---

Избранного светильника, тьму идолослужения в державе Русской разгнавшаго и светом Божественныя веры ю просветившаго, восхваляем тя, святый равноапостольный княже Владимире: ты же яко выну со дерзновением предстояй Царю царствующих, не престай моляся о достоянии твоем и твоими молитвами сохраняй нас от всяких бед и зол, да со умилением благодарственно зовем ти:

Радуйся, Владимире, державы Руссия просветителю.

### Икос 1

---

Ангелом и человеком Творец, времена и лета во Своей власти положивый и судьбы государств и народов устрояй, егда благоизволи призвати род русский от тьмы идолослужения ко свету истины и правды вечныя, постави тя, благоверный княже, благовестителя и совершилеля сея всеблагия воли Своей. Темже, благодаряще Творца и Спаса нашего, славословим тя, яко великаго избранника Божия нашего ради спасения, с веселием зовуще:

Радуйся, равноапостоле, ко просвещению народа русскаго Премудрым Промыслом предъизбранный; радуйся, от первозваннаго апостола на горах Киевских пророченный.

Радуйся, преславный сосуде Божественныя благодати, державе твоей дарованный; радуйся, пречудный кореню, из негоже на земли нашей произрасте велие древо правоверия.

Радуйся, яко тобою Имя Господне во всех пределех страны твоей прославляется; радуйся, яко и твое преславное имя от всех родов русских с любовию воспевается.

Радуйся, Владимире, державы Руссия просветителю.

### Кондак 2

---

Видя суetu бездушных идолов и прелесть диавола еюже уловляет темныя люди в сети беззакония, купно же слыша святых первомученик русских за Христа Феодора и юнаго Иоанна, глаголющих безбожным мучителем: “Бози ваши не суть бози, но древо, еже днесъ пребывает — утро сгнило есть. Един же есть Бог Истинный, Иже сотвори Небо и землю”; тогда возгорелся еси сердцем, во еже взыскати и уведети Сего Единаго Истиннаго Бога, Емуже покланяется всяко колено Небесных, земных и преисподних, немолчно поспевая: Аллилуя.

## Икос 2

---

Разум всевышний приосени тя, егда предсташа ти проповедницы разноверни и потщался еси, да не уловлен будеши в сети лжеучения, но да обрящеши веру истинную и спасительную. Темже ублажаем тя:

Радуйся, премудрый просветителю народа русского; радуйся, разум богопросвещенный стяжавый.

Радуйся, яко ухищрения и суесловия лжеучителей посрамил еси; радуйся, яко глаголы Жизни Вечной в словесех Мудреца Истинного мудре уразумел еси.

Радуйся, лучу Божественного света посреде тьмы лжеверия; радуйся, стено нерушимая посреде бури страшных языческих.

Радуйся, Владимире, державы Русский просветителю.

## Кондак 3

---

Силою свыше умудрен, послал еси мужи избранныя во страны иные, да видят и испытывают, како ини народи служат Богу и како веру свою от дел своих показуют; тии же вся добре испытавше, достигоша Царства небесного, идже видяще благолепное совершение Божественного священнодействия, мнеша себе не на земли, но на Небеси стояти, и со умилением сердца воздаша хвалу Господеви, зовуще: Аллилуя.

## Икос 3

---

Имуще в сердцах своих твердое уверение, яко вера греко-восточная воистину есть православная и яко священнодействия ея паче всех иных велелепна, послании тобою мужие, возвратившиеся во Отечество свое исповедаша сия пред лицем твоим и пред старейшинами твоими, рекоша же: “Никтоже вкусив сладкаго, восходит горькаго, тако и мы не можем паки остати зде и служити кумиром”. Яковое извещение прием, возгорелся еси ревностию по вере истинной. Сего ради величаем тя:

Радуйся, гласу Божественным благороди прилежно внимавый; радуйся, водительству Святаго Духа усердно последствовавый.

Радуйся, яко советники твоя умудрил еси; радуйся, вся люди твоя советы твоими ко истинной вере привел еси.

Радуйся, яко со тщанием поискал еси доброго бисера Христа; радуйся, пчело трудолюбивая, мудре взыскавшая цветы, в них же сладкий мед истины и спасения.

Радуйся, Владимире, державы Русский просветителю.

## Кондак 4

---

Бурею сумнений и недоумений не поколебался еси повнегда уведети тебе веру истинную, православную, но аbie восхотел еси прияти Святое Крещение со всею державою твою, да купно с нею, яко отец со чады своими, достойно воспоеши Богу: Аллилуя.

## Икос 4

---

Слышавше боляре и старейшины яже о вере истинней, помянуша праматерь твою святую княгиню Ольгу, яже прият Святое Крещение в Цареграде, и рекоша: аще не бы блага бысть вера сия, не бы прияла ю сия мудрейшая в женах. Темже и мы, присно поминающе премудрую Ольгу, благодарственно зовем ти:

Радуйся, яко соблюл еси Божественное семя, еже всея в сердце твое блаженная праматерь твоя; радуйся, яко святым заветам тоя последовал еси.

Радуйся, яко провидел еси в ней зарю спасения народа твоего; радуйся, солнце возшедшее по заре той.

Радуйся, свете, старейшины твоя просветивый; радуйся, вся люди твоя ко Христу приведый.

Радуйся, Владимире, державы Руссия просветителю.

## Кондак 5

---

Боготканную одежду Святаго Крещения восхотев получити, помыслил еси, откуду и како имети имаши толик сонм пастырей и учителей, да просветят вся люди твоя с тобою, и како пояти себе жену, в вере святей испытанну, дому твоему благую строительницу, чадом твоим матерь во Христе, советницу же всем во благочестии, и о сем всем поревновав, дух твой приведе тя ко стране Гречестей, идже вернии от лет древних благочестно воспевают Богу: Аллилуя.

## Икос 5

---

Видевше царие гречестии всю страну твою во тьме идолослужения коснящу, небрегоша тя, яко кумиром служаща, обаче побеждени бывше от тебе и уведевше крепкое изволение твое прияти Святое Крещение и вся люди твоя ко Христу привести, исполнившаяся радости и вдаша ти сестру свою Анну на брак, пастыри же и учители народу твоему. Темже и мы, присно радующеся святому сему союзу твоему, воспеваем тя:

Радуйся, яко посетил есть тя Восток свыше; радуйся, яко звезда Всевышняго приведе тя к Востоку, идже Премудрость созда себе дом и утверди столпов седмь, седмь Соборов Вселенских, иже утвердиша веру Христову по вселенней.

Радуйся, яко сия есть вера апостольская, сия вера вселенную всю утверди; радуйся, яко от чистаго источника чистое учение Христово принял еси.

Радуйся дому твоего и чад твоих добрый рачителю, радуйся, всего народа твоего премудрый наставниче.

Радуйся, Владимире, державы Руссия просветителю.

## Кондак 6

---

Пастырие и учители, ихже принял еси, прехвальне княже, от царей греческих, яко да напаяют всю страну Русскую ученьми Божественными, со тщанием течаху на делание

свое, благодарственно поюще призвавшему народ твой ко спасению Господу Богу: Аллилуйя.

### Икос 6

---

Возсия пречудне чувственныи свет в помраченою недугом слепоты очию твою, в душе твоей свету благодати возсиявшу, егда, просветився Божественным Крещением, изшел еси от святыя купели, еже ощутив, радостно воскликнул еси: “ныне познах Бога Истиннаго”. Темже ублажаем тя:

Радуйся, светильниче, огнем Божественныя благодати во тьме язычства возжженный; радуйся, благовестителю света Христова, омраченная очеса и сердца народа твоего отверзай.

Радуйся, яко умною очию твою провидел еси Божие смотрение о державе твоей; радуйся, яко до конца потщалясь еси, да и вси людие твои просветятся в нем.

Радуйся, богосветлая главо князей Русских; радуйся, славнейшее украшение и похвало Церкви Христовы.

Радуйся, Владимире, державы Русския просветителю.

### Кондак 7

---

Хотя просветити Божественным Крещением народ русский, первое повелел еси креститися сыновом и вельможам твоим, да вси людие, последующе стопам их, со благим произволением приступят ко Святому Крещению, благочестно зовуще Богу: Аллилуйя.

### Икос 7

---

Ново творение во Христе яви тя, по Свяtem Крещении, образ жития твоего: ревнитель бо первое быв идолослужения, последи выну по вере Христовой ревновал еси: возлюбил же еси кротость и милосердие, воздержание и целомудрие и все житие по заповедем Господним. Чудящеся убо благому пременению сему, благочестно зовем ти:

Радуйся, яко росою Святаго Духа пламень страстей в себе угасил еси; радуйся, яко огнем Божественныя благодати вся помышления и вся чувствия твоя согрел еси.

Радуйся, селения Господня, церкви святыя, паче всех селений земных, возлюбивый; радуйся, Божественныя службы и Христова учения паче всех деяний и учений взыскавый.

Радуйся, образ новаго жития всем людем твоим в себе показавый; радуйся, сирых и убогих благий кормителю и попечителю.

Радуйся, Владимире, державы Русския просветителю.

### Кондак 8

---

Странное бе, купно же и радосттворное видение, егда тмочисленный сонм мужей и жен, юнош и дев, также незлобивых младенец с радостию течаху к реце Днепру, якоже ко

Иордану, идже крещахуся во Имя Отца и Сына и Святаго Духа, иереом на брезе возносящим тайнодейственныя молитвы и воспевающим Господу песнь: Аллилуия.

### Икос 8

---

Весь был еси объят неизреченою радостию, достоблаженне княже, зря крещаемыя люди твоя, и во умилении сердца, воздав хвалу Спасителю Богу, усердно молил еси Его, да призрит на новопросвещенныя люди Своя, да утвердит их в вере и благочестии и да прославит Имя Свое в странах русских. Вспоминающе убо преславное и прерадостное сих сбытие, приносим ти благодарственныя и похвальныя песни сия:

Радуйся, виновниче спасения безчисленных душ в земли Русской; радуйся, неоскудеваемый источникье благословений и милостей Божиих к народу твоему.

Радуйся, благий вертоградарю, сад Божественныя веры в царстве твоем насадивый; радуйся, поточе сладости, напоивый водою благочестия люди руссия.

Радуйся, яко Божественную веру прославил еси, прелесть же идольскую посрамил еси; радуйся, яко Царь царей дарова тебе мудрость Соломонову, кротость Давидову, ревность Илиину, правоверие апостольское.

Радуйся, Владимире, державы Руссия просветителю.

### Кондак 9

---

Все еество Ангелов, хранителей рода человеческаго, прослави тя, благоверный княже, егда повелел еси отцем и матерем вдаяти дети своя в учение книжное, да разумеют, яже веруют, и да познают, како житие свое добре по вере провождати. Темже и ныне призри на учащияся Божественным писанием, и на отцев и матерей их, паstryрей же и учителей, споспешествующих им во учении, благослови, укрепи и настави я во трудех их, да возрастают в вере истинней и в добром житии, поюще Богу: Аллилуия.

### Икос 9

---

Вития многовещанныя не могут достойно изобразити величие благодеяний, дарованных тобою, княже, земли твоей: водворив бо в ней Божественную веру, избавил еси ю от мрака языческаго и вечныя погибели, открыл еси ей путь ко истинному просвещению, ко спасению и земному благоденству. Сего ради со благодарением благочестно зовем ти:

Радуйся, могущества и славы державы Руссия основателю; радуйся, истиннаго просвещения и благочестия в ней насадителю.

Радуйся, в народе твоем языческих суеверий и злых обычаев искоренителю; радуйся, идольских требищ и кумиров потребителю.

Радуйся, святых храмов создателю; радуйся, равноапостольному царю Константину равночестный подобниче.

Радуйся, Владимире, державы Руссия просветителю.

## Кондак 10

---

Спасти хотя от вечных погибели царство твое, в бездне идолослужения гибнувшее, подъял еси велия труды и попечения, обходя грады и веси земли твоей и посылая повсюду пастыри духовные, во еже Божественною верою Святым Крещением люди твоя просветити, и научити их Единому Истинному Богу пети: Аллилуя.

## Икос 10

---

Стена твердая был еси земли твоей во вся дни живота твоего противу врагов той и виновник благоденствия и славы ея; буди и ныне защитник необоримый от враг видимых и невидимых и помощник в нуждех и скорбех нам, с любвию вопиющим тебе:

Радуйся, благопечительнейший пастырю народа русского; радуйся, благострадательнейший отче сирых и страждущих.

Радуйся, готовый спешниче ищущих вечного спасения и истинного просвещения; радуйся, слава и радование державы Русской.

Радуйся, присный помощниче в многотруднем деле народоуправления; радуйся, мощный спборниче в брани воинства русского.

Радуйся, Владимире, державы Русской просветителю.

## Кондак 11

---

Пение умиленное приими от нас, угодниче Божий, сокруши твоими молитвами вся враги наша, насади православную веру среди языков страны русской, неведущих истинного Бога, искорени в ней вся ереси и расколы, да сынове русские едиными усты и единственным сердцем славят Бога, поюще Ему: Аллилуя.

## Икос 11

---

Светозарное светило, просвещающее сиянием своим страну русскую, ты еси достохвальне княже Владимире, разгоняя мрак идолослужения и показуя путь к истинному просвещению и небесному блаженству. Сего ради, прославляюще тя глаголем:

Радуйся, звездо, просвещенная от незаходимаго Солнца Правды; радуйся, путеводителю, правую стезю к вечному спасению нам открывый.

Радуйся, мощный спешниче и укрепление проповедников православных веры; радуйся, присный покровителю благих наставников юношества и всех благотрудящихся на пользу общую.

Радуйся, скорый помощниче всех, к помощи твоей прибегающих; радуйся, яко всем усердно тя чтушим, благотворныя советы подаeshи.

Радуйся, Владимире, державы Русской просветителю.

## Кондак 12

---

Благодать Пресвятаго Духа испроси нам, преблагай пастырю наш, от Всещедраго Бога и Спаса нашего, вразумляющую и укрепляющую нас в деле спасения, да не бесплодна будет в нас насажденная тобою святая вера, но да уклоняющеся от путей нечестия и заблуждений, ходим во свете заповедей Божиих и достигнем вечнаго блаженства, воспевающе Богу: Аллилуя.

### Икос 12

---

Поюще твоя премногая и преславная благодеяния, явленная державе нашей в просвещении тоя светом Божественныя веры, купно же велия твоя труды и подвиги, во благоустройство ея подъятыя, усердно благодарим и восхваляем тя, с любовию зовуще:

Радуйся, богоизбранне и богопрославленне самодержче земли Руссия; радуйся, несокрушимое ограждение ея, покрове и защищение.

Радуйся, райское древо, произрастившее две пречудныя отрасли, святых страстотерпцев Бориса и Глеба, радуйся, первостоятелю святых Руссия Церкве.

Радуйся, апостолов сопрестольниче и сливковствователю; радуйся, яко на землю Русскую выну призираеши благ временных и вечных ей у Бога ходатайствуеши.

Радуйся, Владимире, державы Руссия просветителю.

### Кондак 13

---

О прехвальный и предивный равноапостоле, великий княже Владимире, приими милостивно от нас благодарение сие о всех, яже тобою воздаде Господь нам, отцем и праотцем нашим и всей державе Русской, начен от дне Крещения даже до сего часа, и моли Всеблагаго Бога пробавити милость Свою на ны и на роды родов наших, утвердити ны в правоверии и благочестии, хранити же от всех бед и зол, да сподобимся с тобою, якоже чада со отцем, во веки воспевати Богу: Аллилуя.

*Этот кондак читается трижды, затем икос 1 и кондак 1*

### Молитва

---

О великий угодниче Божий, богоизбранный и богопрославленный, равноапостольный княже Владимире! Ты отринул еси злование и нечестие языческое, уверовал еси во Единаго Истиннаго Триипостаснаго Бога и, восприяв Святое Крещение, просветил еси светом Божественныя веры и благочестия всю страну Русскую. Славяще убо и благодаряще Премилосердаго Творца и Спасителя нашего, славим, благодарим и тя, просветителю наш и отче, яко тобою познахом спасительную веру Христову и крестихомся во Имя Пресвятыя и Пребожественныя Троицы: тою верою избавихомся от праведнаго осуждения Божия, вечнаго рабства диаволя и адова мучительства: тою верою восприяхом благодать всыновления Богу и надежду наследования Небеснаго блаженства. Ты еси первый вождь наш к Начальнику и Совершителю нашего вечнаго спасения Господу Иисусу Христу; ты еси теплый молитвенник и ходатай о стране Русской, о воинстве и о всех людех. Не может язык наш изобразити величие и высоту благодеяний, тобою излиянных на землю нашу, отцев и праотцев наших и на нас, недостойных. О

всеблагий отче и просветителю наш! Призри на немощи наша и умоли премилосердаго Царя Небеснаго, да не прогневается на ны зело, яко по немощем нашим по вся дни согрешаем, да не погубит нас со беззаконьми нашими, но да помилует и спасет нас, по милости Своей, да всадит в сердце наше спасительный страх Свой, да просветит Свою благодатию ум наш, во еже разумети нам пути Господни, оставити стези нечестия и заблуждений, тщатися же во стезях спасения и истины, неуклоннаго исполнения заповедей Божиих и уставов Святыя Церкве. Моли, благосерде, Человеколюбца Господа, да пробавит нам великую милость Свою, да избавит нас от нашествия иноплеменных, от внутренних нестроений, мятежей и раздоров, от глада, смертоносных болезней и от всякаго зла, да подаст нам благорастворение воздуха и плодоносие земли, да даст пастырем ревность о спасении пасомых, всем же людем споспешение о еже усердно службы своя исправляти, любовь между собою и единомыслие имети, на благо же Отечества и Святыя Церкве верне подвизатися, да возсияет свет спасительныя веры в стране нашей во всех концах ея, да упразднятся вся ереси и расколы, да тако поживше в мире на земли, сподобимся с тобою вечнаго блаженства, хваляще и превозносяще Бога во веки веков. Аминь.